

# সত্যামৃত



সমর সিংহ





# স ত্যা মৃ ত

র স র চ না

সমর সিংহ

প্রথম প্রকাশ ২০১০

দ্বিতীয় প্রকাশ ২০১২

মলাট যেক্ষরানিত

লেখক

মেয়েকর সিজিলে

অতুল কৃষ্ণ সিংহ

প্রকাশিকা

মঞ্জু সিংহ

মুদ্রণ

এস.এম.জে. এন্টারপ্রাইজ এণ্ড প্রিন্টার্স

জয়ানগর পথ, গুরাহাটী-২২

দূরভাষ : +৯১৯৮৬৪১০৬৩৩৪

দাম : ৫০.০০ টেকা হুদা।

উৎসর্গ

লুহঙর পিসে জেগর

জীবন খালুজালু অসে

ঔগরাঙ

## ভূমিকা

ভুল। আমি করিয়ার— উপৈইলে চুমকরিয়ার; গুর্দাগ জবর অইলে হারপেয়াউ হেকঠেলাল আনিকা করিয়ার; উহানে আমি মানু। এ লৌটাক ধরাধাম এহানাত লেখাজুখা নেই মানুর বাস, উতারমা হাবির চরিত মান্না নেই। কিন্তুমান, হাবির বামা আকহান— নুঙেই অয়া হাবিরাংত জিঙিয়া বরাবালা অয়া হারৌ-পিয়মল জিংতা অইক। এ উদ্দেশ্যে পুরা করতে কুনগ ভুলর আশ্রয় নিতারাগা, কুনগ বু নাপরিয়া অত্যাচারর নায়কে পরিণত অয়া পরিবাররাং কলংকর গেটি অইতারা। এহানেই জীবনধারার দস্তুরহান, এহানরে খণ্ডানির হান্নারে মানু আগর জীবনর একমাত্র কর্তব্য বলে পারিয়ার।

আসলে হাবির মূলে মেয়েক আকগ, জেগ উচ্চারণ করতে আমি নিঙ শ্রদ্ধার আশ্রয় লয়ার। উগ ‘জ্ঞান’। এ জ্ঞানর মিঙালল সংসারর বিকাশ। অবশ্য জ্ঞান ছাড়া কুনগ পরিপূর্ণতে নাগৈ থাঙৌ মানু আগ সর্বাঙ্গসুন্দর অইতে যে নীতি জ্ঞানর দরকার ও জ্ঞান হুতুমেউ হাবিরকা ঈশ্বরতুল্য।

বিষুপ্রিয়া মণিপুরী সমাজ তথা সমাজর মানু গৌড়ীয়পস্থী তথা আর্য প্রথার বাহক হিসাবে এবাকাউ নিজরে পরিচয় দিয়া আইতারা। তানুর রীতি-নীতি, আচার-বেবার জিংদরে চেইলে অন্য সমাজরাংত নিয়ামক্ষেত্রে তঙাল উহানর পরমাণ পেয়ার। বিশেষ করে ধর্মীয় বারা উহানরে তানু আঠৈপা করে হারপাসি, উহান তানু বিশেষ উপায়ে আকার ইঙ্গিতে প্রকাশ করতেও দেহিয়ার। কিন্তুমান, কতিহান গ্রহণযোগ্য উহান জ্ঞানী মানুরে মাংতাই।

লুহঙ। সংসার জিংতা করানির সফলতম বিবেচ্য নীতিগত পদ্ধতিহান। কিন্তুমান, লহঙর পিসে কুনগৈ সংসারতে জিংতা করতারা তবে স্বার্থক সংসারী অয়া নাগৈ; এ ঘটনা আমি হাবির গরে প্রায়ই দেহিয়ার হুনিয়ার।

আশা করৌরি, পাঠকবর্গ শৈনেই উপকৃত অইতাই। শ্রীমতী মঞ্জুরে প্রকাশনার বরি দায়িত্বহান পান্তল করে দিয়া মর উদ্দেশ্যে আরাকৌ দরা করেদিল। ধন্যবাদ। উপযুক্ত সময়ে যে যে সজ্জনে মর উদ্দেশ্যে থাকাং দিয়া বপকরানির ইথৌ জুগেইলা তানুরাং মি চিরকৃতজ্ঞ। সমাজরাং তথা সাহিত্যর বারণগত মি আরাক খুন্তল আহান উপহার দিয়া পারলু, এহানরকা মর জীবন ধন্য নিংকরৌরি। জয় বিষু।

## প্ৰাসংগিক চিন্তা

শ্ৰীসমৰ সিংহক দীৰ্ঘকাল ধৰি মই এগৰাকী অতি পৰিশ্ৰমী, নিষ্ঠাবান, পৰিশীলিত আৰু সৎ ব্যক্তি হিচাপে অনুভৱ কৰি আহিছো। পিছলৈ তেওঁক যেতিয়া এগৰাকী কথাশিল্পী, গায়ক হিচাপে অতিৰিক্তভাৱে জনাৰ সুযোগ পালো, তেওঁৰ প্ৰতি মোৰ আকৰ্ষণ বাঢ়িল আৰু তাৰ ফলত বাঢ়ি গ'ল হৃদয়তা। আজি এই সম্পৰ্ক ভ্ৰাতৃত্বৰ নিবিড় আয়তনলৈ পৰ্যবসিত।

তেওঁ বিষুগ্ৰপ্ৰিয়া মণিপুৰী ভাষাত লিখে, অসমীয়া ভাষাতো তেওঁ সমানে দক্ষ। জানিব পৰা মতে এই ভাষাত সৃষ্টি হোৱা সাহিত্যৰ পটুৱৈৰ সংখ্যা সীমিত। কিন্তু এনে সীমাবদ্ধতলৈ ক্ৰম্বেপ নকৰি তেওঁ নিজেও লিখিছে আৰু নিজৰ ছপাশালৰ পৰা এই ভাষাৰ গ্ৰন্থ লাভ-লোকচানৰ বিচাৰ নকৰাকৈ ছপাই আহিছে। এনে প্ৰচেষ্টা কেৱল প্ৰশংসনীয় নহয়, বিৰলো।

বিষুগ্ৰপ্ৰিয়া মণিপুৰী ভাষা সাহিত্য-ৰূপত যেনেকুৱা, পঢ়িবলৈ ললে মোৰ দৰে এই ভাষাত দক্ষতা নথকা পাঠক এজনৰ পক্ষেও মোটামুটিভাৱে বুজি পোৱাত অসুবিধা নহয়। যদি এই ভাষাত মণিপুৰী-বাংলা-অসমীয়া-ইংৰাজী অনুবাদ সম্বলিত শব্দকোষ বা অভিধান এখন থাকিলহেঁতেন, বুজা কামটো তাৰে আলম লৈ আৰু উজু কৰিব পৰা গ'লহেঁতেন।

সমৰ সিংহৰ 'সত্যামৃত' পঢ়ি থোৱতে মনলৈ অহা ধাৰণাটো হ'ল এই যে এইখন এখন গুৰুত্বপূৰ্ণ গ্ৰন্থ, যদিও লেখকে ইয়াক ৰস-ৰচনা বুলি কৈছে। গ্ৰন্থখনৰ ভূমিকাৰ পৰাই এই কথা স্পষ্ট হৈ পৰে। তেওঁ কিতাপখনৰ মুখ্য আলোচ্য প্ৰতিপাদ্য হিচাপে 'জ্ঞান' বিষয়টোৰ মাজত নিহিত হৈ থকা তাত্ত্বিক আৰু বাস্তৱিক তথ্য ব্যঞ্জিত কৰাৰ চেষ্টা কৰিছে। এই কাম কৰোতে বিষয়টো সন্দৰ্ভত তেওঁ যে বিস্তৰ অধ্যয়ন কৰিছে, সেইটো স্পষ্টকৈ ফুটি উঠিছে। বহিৰ্জগত আৰু অন্তৰ্জগত সামৰি জ্ঞানৰ ভূমিকা মানৱ-জীৱনত কেনেকৈ প্ৰসাৰিত, ক্ষুদ্ৰ কলেবৰৰ এই গ্ৰন্থখনিৰ মাজতো সি অতি বিশদভাবে আলোচিত হৈছে।

Tom Stoppard য়ে 'The inversion of love (1997)' গ্ৰন্থখনত লিখা দুটামান বাক্য উদ্ধৃতি কৰাৰ লোভ সামৰিব নোৱাৰিলোঁ। 'Knowledge is good. It does not have to look good or sound good or even do good. It is good just by being knowledge. And the



only thing that makes it knowledge is that it is true. You can't have too much of it and there is no little too little to be worth having'। সমৰ সিংহৰ 'জ্ঞান'ৰ ৰচনাখনত যেন এনে এক সত্যৰ ধ্বনি নেপথ্য-সংগীতৰ দৰে বাজি আছে। তেওঁ ধৰ্মৰ সত্য আৰু অধৰ্মৰ মাজত নিহিত পাপবিদ্ধতাৰ কথা, লগতে মানুহৰ চেতনা-সম্ভূত সত্যাসত্য নিৰ্ধাৰণৰ সত্য, কালিকা আৰু প্ৰয়োজন সম্পৰ্কে বৰ্ণাবলৈ ঐতিহাসিক চেতনা, ঐতিহ্য-পৰম্পৰা, আদ্যাত্মিক বিকাশ আৰু মানুহৰ উত্তৰণগত সাম্প্ৰতিক অৱস্থানৰ মাহাত্ম্য অস্বীকাৰ কৰা নাই। কিন্তু সমাজ আৰু মানৱ-মননৰ প্ৰগতিবাদী অভিলক্ষ্য যে সৎ জ্ঞানৰ প্ৰয়োগৰ দ্বাৰাহে চুব পৰা যাব— এনে বাস্তৱ সম্পৰ্কে সমৰ সিংহ অদ্বান্দ্ৰিক আৰু নিঃসংশয়। তেওঁৰ গ্ৰন্থৰ সামৰণি এনে চিন্তাৰে এক প্ৰতিকৃতি :- 'আমি হাবিয়ে আকতা অয়া সৎ গুৰুৰ আশ্ৰয়ে, আসুৰিক বৃত্তি বৰ্জন কৰিয়া আত্মচেতনা হজাক কৰুৱেইক। নিজৰ বিতৰে গুমজিয়া আসে দৈবশক্তি উহানৰে মিঙাল দিয়া পৰমাত্মাৰ তুল আত্মাৰ সংযোগ কৰুৱেইক। দেখতাঙাই— বুদ্ধ, কবীৰ, নানক, ৰামকৃষ্ণ, বিবেকানন্দ আমাৰাং আয়া বাৰ জৰম অইতাইগা; পৃথিবী ইমা ধন্য অইতৈ। পৃথিবী ইমাই বাৰ ঔক্খি নিংশা কাৰতৈ।'

এজন লেখকৰপৰা আন এজন লেখকলৈ এয়েই আন্তৰিকতম বিনিময়। সমৰ সিংহ আমাৰ বাবে আদৰ্শ হওঁক।

—ড° ভূপেন শৰ্মা



জ্ঞান বুলতে সাধারণতঃ সংবেদনশীল জ্ঞান উহানরে বুজিয়ার। আহি, কান, নাক, জু বার চামরা এ পঞ্চ ইন্দ্রিয়রেল আমি জেতা অনুভব করিয়ার; পুহাক জীবগোষ্ঠিযৌ এ জ্ঞানর চৌহিদা এগর বিতরে আবদ্ধ।

কবিগুরু রবীন্দ্রনাথ ঠাকুরেউ মাতেসিল, জগৎ এহান দি-ভাগ। বহির্জগৎ বার অন্তর্জগৎ। বহির্জগৎ সীমাবদ্ধ বার অন্তর্জগৎ অসীম নিত্য। সাধারণ মানুরে বহির্জগতর জ্ঞান উহানরেই যথেষ্ট বুলিয়া খালকরতারা, কিন্তুমান যোগীঋষিয়ে ভাবর জগৎ উহানরেহে নিয়াম গুরুত্ব দিতারা। কিয়াবুল্লে, ও ভাবর জগৎ উহানর বিতরে যময়া আসে আধ্যাত্মিক জগৎ উহান হারপা পারানি উহানেই মানু আগর পরম শান্তিহান, উবাকা মাত্তারাতা ‘জ্ঞানপ্রাপ্তি’।

জ্ঞান এহান জীব আগরাং হাবিত্ত ডাঙর বার শ্রেষ্ঠ উপাদানহান। মানু আগরাং এ জ্ঞান পরিপূর্ণ নাইলে, মানবত্বর দিক উহান চাংখল নার উহান তার কর্মই পরিচয় দেব। উহানল জ্ঞান বিসারেয়া, জ্ঞান বিলেইতে, জ্ঞানর প্রচার করতে পৃথিবীর বুকে জরম অইল— আশ্রম, মন্দির বার সংসঙ্গ... এসাদে লেখাজুখানেই প্রতিষ্ঠান।

শ্রীমদ্ভগবৎ গীতার চতুর্থ অধ্যায়র জ্ঞানযোগে, উল্লেখ আসে—

যদা যদা হি ধর্মস্য গ্লানির্ভবতি ভারত।

অভ্যুত্থানমধর্মস্য তদাত্মানং সৃজম্যহম্ ॥৪১৭

পরিত্রাণায় সাধুনাম্ বিনাশায় চ দুষ্কৃতাম্।

ধর্ম সংস্থাপনার্থায় সন্তবামী যুগে যুগে ॥৪১৮

‘যেবাকাই ধর্মর পতন বার অধর্মর উত্থান অর, উবাকাই মি নিজে জরম অয়া দুষ্ট, পাপীহাবিরে বিনাশ করৌরি বার সাধুজনরাং শান্তির বৌ এলকেয়া যুগে যুগে ধর্মর প্রতিষ্ঠা করৌরি।’

এপেইং প্রশ্নহান অইলতাই, ধর্ম বা অধর্ম উহান কিহান বার ‘সাধুজনরাং শান্তির বৌ এলকেয়া যুগে যুগে ধর্মর প্রতিষ্ঠা করৌরি’ বুলতে, সাধুজন উতা কুন্তা বার ধর্ম প্রতিষ্ঠা করের জন উগৈ বা কুংগ? কিয়াবুল্লে, আজিকার দিনেতে, ধর্ম প্রচারকর ভির কুন মহাসম্মেলনর ভিরেত্তৌ নাউ যাৎ।

পইলা হারপেইক ধর্ম এহান কিহান।

উল্লেখ আসে, ধর্ম বুলতে 'ইহামূত্র নি-শ্রেয়স অভ্যুদয় কারকঃ ধর্মঃ' — ইহলোক বার পরলোকে নিশ্চিত শ্রেয়রূপে জেহানে উন্নতি করুবা পারের, উহানেই ধর্ম। সামকরিয়া মাতিক বুল্লে— এপেইৎ কুন সন্দে নেই যে, ধর্ম বুলিয়া নির্দিষ্ট কুন পরিচয় বার কুন চৌহিদা নেই। কুন বিশেষ নীতি ইলয়া যদি কুন মানু আগর ইহলোক তথা পরলোকে উন্নতি সাধন অর উতাইলে ও বিশেষ নীতি উহান, উন্নতি সাধন অইল জন উগর ধর্মীয় নীতিহান। উবাকা ও জন উগে তার নীতি উহানরে যে কুন নাং আহানল পরিচয় দিয়া পারের। হজরত মহম্মদে তার প্রবর্তিত নীতি উহানরে 'ইসলাম' বুলিয়া নামকরণ দিয়াসিল, ঠিক উসাদে, যীশুর প্রবর্তিত নীতি উতা 'খৃষ্টান'। এ নামকরণর পিঠিৎ ধর্ম মেয়েক এগ যুক্ত করিয়া বার ও নীতিপন্থী মানুরে পিসেদে 'ইসলাম ধর্ম', 'খৃষ্টান ধর্ম' বুলিয়া প্রচার করলা; জেহানর ফলে, আজিকার দিনে আমি নিজরে অমুক ধর্মর মানু, তানু অমুক ধর্মর মানু বুলিয়া চেৎ দাবি করিয়ার।

ধর্মর বিপরীত উহানেই, অধর্ম। গতিকে, অধর্মর গজে ব্যুৎপত্তি বর্ণেয়া অর্থ বিশ্লেষণ করানির কুন অর্থ নাউ থার। এহুরুম থাইল 'সাধুজন' উতার পরিচয়।

সাধুজন।

সৎ গুণসম্পন্ন মানু উতারে সৎ-জন, সজ্জন বার সাধুজন বুলিয়া আখ্যা দিয়াসি। সাধারণতঃ এ সাধুজনর হন্না বার সাধুজনমত ইলয়াহে ধর্মর বিকাশ অরতা। যে সময়ত, ধর্মর বিকাশে অধর্মর প্রভাব পরিয়া সাধুজন উতা ধর্মর পথেত্ত থেয়নির উপক্রম অইতারা উপেইৎ স্বয়ং শ্রীকৃষ্ণ ভগবানে ধরিত্রীর বুকে জরম অয়া পৃথিবীর ভার হরণ করেব বুলিয়া শ্রীমদ্ভাগবৎ গীতাত উল্লেখ আসে।

এতা অইলতাই সর্বজনবিধিত জ্ঞান, ধর্ম বার অধর্মর চৌরাপ ব্যাখ্যাহানি। মনে অর, এ ব্যাখ্যা এহানির সটাক আহানৌ আমার মানুরে অনুসরণ নাউ করিয়ার বার মি বিষুপ্ৰিয়া মণিপূরীগ, অজ্জুন-বরুণ বংশধরগ, আমার ধর্মৎ অমুক উহান নাকরের, ওহান গমনেই, মরে না সকৈস, তি চারালগ, মি বামুনগ —এসাদে ধর্মীয় গোড়ামীর বিকৃত বচনমাহেই!

অথচ 'মি অজ্জুনর বংশধরগ' বুলিয়া দাবি করেব বিশুদ্ধ বিষুপ্ৰিয়া মণিপূরী উগরে যদি প্রশ্ন করানি অর যে, অজ্জুন উগ কুংগ?

হয়ত হুতাঙাই— অর্জুন, তৃতীয় পাণ্ডব; শ্রীকৃষ্ণের পরম সখা, কুরুক্ষেত্র যুদ্ধের মহারথী, সব্যসাচী, অর্জুন। শ্রীকৃষ্ণের শ্রীমুখেত্ত গীতোপদেশপ্রাপ্ত পরম পূণ্যজন উগহে অর্জুননাই!

এসাদে অর্জুনের পরিচয়, বর্ণনা বার বিশ্লেষণ এতা লেইরিকে ইকরাতা অইলেউ, এতাই তাত্ত্বিক কুন ভাবার্থ প্রকাশ নাকরের। শ্রীমদ্ভগবৎ গীতাত শ্রীকৃষ্ণই মাতেসিলতা, “হে অর্জুন, উঠ গাণ্ডীবহান দর, যুদ্ধ কর; বৈরী সংহার কর।” এ বাক্য এহান ইলয়া আমি যদি হুদা খালকরিয়ার যে, অর্জুন উগ পরম যোদ্ধাগ, বীরগ বার ধনুর্ধরগ। উতাইলে আমি নিজেই নিজর অজ্ঞানতার পরিচয় দেনহান অর সাৎ বার শ্রীমদ্ভগবৎগীতার সাদানে ধর্মগ্রন্থ আহানরে আমি সাধারণ লেইরিক আহানাৎ লেপকরিয়া ফারা তেনা ল যমকরিয়া থনহান অইতৈ। কিয়াবুল্লে, আমি এপেইৎ আকখুরুম খালকরিয়া চানা লাগতৈ যে, গীতাজ্ঞান এহান যদি হিংসা যুদ্ধত খৌতাল যুগানিরকাই অয়া থার উতাইলে, গীতাহান লমনির উপেইৎ সঞ্জয়ে কিয়া মাতেসেতা যে, মি হারৌ অইলু, অজ্ঞানর আধারেত্ত মুক্তি পেইলু বার এ জ্ঞানর ঠুমপা বাণী এতা নিংশিং অয়া হারৌ অইলু? ঠিক ও অবস্থাৎ অর্জুনে বার এ জ্ঞান এতা হুনিয়া কার-ধনুকল মারা-মারি, কাটা-কাটিং মুরখুল্লি দিয়াসে..., এহান কি সম্ভবতা? তাউতে, গীতাজ্ঞান প্রাপ্ত অয়া হারৌ বা পুলকিত অসিল! এমনকি, গীতার ও অধ্যায়ে অর্জুনের ‘মহাত্মা’ বুলিয়া মাতানিয়ৌ অসিল (গীতা, অঃ ১৮, শ্লোক ৭৪) বার গীতাহান হুনিয়া লমনির উবাকা অর্জুনে স্বয়ং মাতেসে যে, মর অন্তরেত্ত মোহ মাঙয়া গেলগা, মি ‘স্মৃতি’ লাভ করলু (গীতা, অঃ ১৮, শ্লোক ৭৩)। এ অবস্থাৎ, ‘স্মৃতি’প্রাপ্ত অর সুজন উগৈ রকতর গোলা বাহুরানিৎ মত্ত অ-পারেরতা? স্বয়ং গীতাত ইকরা আসে যে, কামনা, বাসনা, কাঙ্ক্ষি-সরনি এতা রজোগুণেত্ত জরম অরতা বার কাঙ্ক্ষি-সরনিত্ত মানুরাং জরম অরতা ‘সন্মোহ’ এহুরুম সন্মোহত্ত জরম অরতা স্মৃতি-ভ্রষ্ট (গীতা, অঃ ২, শ্লোক ৬৩)। থাংতে, স্মৃতিপ্রাপ্ত সুজন আগৈ তথা প্রভুর স্মৃতিং উৎসর্গিতপ্রাণ অর্জুনে হারৌএ আত্মহারা, বিভুলা নায়া হিংসা যুদ্ধৎ প্রবৃত্ত অইলতা? এহান কি অ পারেরতা?

গতিকে, আমি মনে থনি লাগতৈ যে, গীতাত বর্ণিত যুদ্ধ উহান মনর আনিকা লৌহল নাতাউ কু-বেবারর সংস্কারর বিরুদ্ধে বর্ণিত যুদ্ধহান নাতাউ বাসনাত আকর্ষিত কর্মেন্দ্রিয়র গজে বিজয়প্রাপ্তি করানিরকাহে...



আমি পইলা চিনানি লাগতৈ যে, অৰ্জুন কুংগ? হুতুমেউ কি অৰ্জুন  
বুলিয়া কুন বীর পুরুষ আমার বপা-বপেইং আসিলাতা?

অৰ্জুন।

অৰ্জুন বাহি এগর অর্থহান, ঙ্খি। জেগ পবিত্র, স্বচ্ছ, নিষ্কপট, মন-  
বচন-কর্ম চিনকরিয়া নির্মল, উগৈহে অৰ্জুন। জেগৈ পুরুষার্থল অর্জন করে  
পারের উগ অৰ্জুন। গতিকে, ভগবানরাংত জেগৈ জ্ঞান (গীতা জ্ঞান) অর্জন  
করের উগ অৰ্জুন। শ্রীমদ্ভগবৎ গীতাত অৰ্জুনরে সম্বোধন করতে ‘অনধ’,  
‘পরন্তপ’, ‘অনুসূয়া’, ‘ধনঞ্জয়’, ‘ভারত’ আদি নাঙর প্রয়োগ অসে। এ নাং এতা  
হাবি গুণবাচক নাং। ‘অনধ’ বাহি এগর অর্থহান অইলতাই নিষ্পাপ। জেগৈ  
কুকর্ম নাকরের, পাপ কর্মন্ত নিজরে থেইকরিয়া থ পারের উগ ‘অনধ’।

ঠিক উসাদে ‘পরন্তপ’ বাহি এগর ভাবার্থহান অইলতাই, জেগৈ পরম  
তপস্যা করের। ‘যোগ সাধনা’ এহানেই পরম তপস্যাহান বার এ যোগ  
সাধনালহে আত্মা পবিত্র অরতা। থাংতে, জেগ যোগীগ, উগৈ কি যুদ্ধত প্রবৃত্ত  
অ পারেরতা? যোগী উতাতে নিজেউ পরম শান্তিত থায়া আরতারেউ শান্তি  
প্রদান করতারাতা। ‘অনুসূয়া’ বাহি এগর অর্থহান পবিত্র। ‘ভারত’ অর্থে, দেশর  
হিতৈষী নাতাউ ভারতবাসীর বিতরে শ্রেষ্ঠ সুজন উগ, তথা ‘ধনঞ্জয়’ বাহি  
এগর প্রয়োগ অরতা জ্ঞান-রত্নরূপী ধনপ্রাপ্ত সুজন উগরে বুজেইতে নাতাউ  
যোগ-রূপী অবিনাশী লাভ অর্জন করে পারেসিল এ অর্থ বুজেইতে।

এহুরুম বুলন দিক অৰ্জুনর ধনুক বার কারর পরিচয়র উবেদে—

ধনুক এহান, বাস্তবে যুদ্ধ নাতাউ পুরুষার্থর প্রতীকহান; বার এহান দুষ্ট  
দমনরৌ প্রতীক আহান। গতিকে অৰ্জুনর গাণ্ডীব ধনুক উহান, মনর আসুরিক  
প্রবৃত্তি উতারে সংহার করানিরকা আখ্যায়িত পুরুষার্থর প্রতীকহান। জ্ঞানরূপী  
কারল অৰ্জুনে জীবনর লক্ষ্যভেদ করানিং নিয়াম সিদ্ধহস্ত আসিল। উহানল  
তারে ধনুর্ধর বুলিয়া মাতেসিতা।

উহানাই, এ পাস্তান্না একুশেত্ত এহানেই ঙ্খি অর যে, অৰ্জুনর গাণ্ডীব  
ধনুক উহান বার অক্ষয় তুণ দিয়হানি, তার দিব্য মানসিক পুরুষার্থর  
প্রতীকহানি। উহান নাইলেতে হাবিহানে আকখুরুম খালকরিয়া চেইক যে,  
কারর কুন তুণ কুনোদিন অক্ষয় অ-পারেতা? এ ক্ষেত্রে, ঈশ্বরীয় জ্ঞান

উত্বরেহে আমি অবিনাশী বুলিয়া মাতে পারিয়ারনাই! এহুরুম মানুর মন বার বুদ্ধিরে যদি আমি ‘অক্ষয় তূণ’ বুলিয়া নিংকরিয়ার উত্বাইলে, ও অক্ষয় তূণ উগৎ অসংখ্য অবিনাশী জ্ঞান বুজানিয়ৌ পারিয়ার। মাত্তেতে হুরু কথাহান, মানুর অট দিয়গির আকারহানৌ চেইতে ধনুকহানর সাদানে। আসলে, অজ্জুনে এ থতারূপী ধনুকহানাৎ জ্ঞানরূপী কার বহেয়া গাদেসিল উবাকা লক্ষ্যভেদ করেসিলতা।

থাংতে, খালকরিয়া চেইক, আমি কিসাদে অজ্জুনের আমার বপাগ বুলিয়া ডাটয়া দাবি করিয়ারতা! আসলেতে, আমি খিযাল করানি থক্গ যে— ধর্মগ্রন্থ বার মহাকাব্য আদিত উল্লেখিত হিতোপদেশ, বাণী তথা য়ারি ওত্বারে হৃদয়ঙ্গম করতে আসুটাক না গিলিয়া আকেইহান আকেইহান তথ্যরে কুনে-কাঞ্চলেত্ত বিচার করিয়া ওক্খি ভাবল গ্রহণ করানি। উবাকা দেখতাওই, ধর্মর নাও গোড়ামীর দিক উহান সুপৌ মাওয়া জিতৈগা। উপেইৎ না হুনতাওই— প্রয়োজনে, অ-প্রয়োজনে ‘গম নেই’, ‘থক নেই’ নাতাউ রুহীবৃত্তির কল্লিঙে মৎকরা রাহির দরা খল্লিক ওতা।

আদিকালেও আজিপেয়া মানব সমাজের কত শ্রেণীর মানুষ, মানবীয় অস্ত্রের শিকার অসি। ও মানবীয় অস্ত্রের আঘাতে ঠই উঙসি কপালখিপা জন উতা আমারেই হাদির কুনগর বেইবুনি, বনকলকেই বার মারুপ-মাসাং।

সফলতা আহক-নাহক সময়ে সময়ে এ বিষয়ের গজে বুদ্ধিজীবী, লেখক, সাহিত্যিকে তঙাল তঙাল কায়দাল প্রতিবাদ করিয়া আহেসি থাঙৌ, এবাকাউ হৌরে-হৌ ‘ষেইসে থে’ উহান দেহিয়ার। উহানৌ কাদা আগদে থদিক, ও মানবীয় অস্ত্রের উৎপীড়নের ইন্ধন যুগেয়া বার দাপা আহানর হারৌর জিনা।

কথাচুটিরে গুরেয়া পেচেয়া আপ্পানে নিদ্দুম ডিগল নাকরিয়া ইজ্জু ক মাতানিয়ৌ যাকরের। তবে, কথার কথা আহানৌ আসে— ‘ইজ্জু কথার রস কম।’ উহানে, কথার হাদিৎ কথা লুকেয়া বিষয়হানরে রহস্যপূর্ণ করানির হন্মাল মূল ইথেইগর লেইসিগ বারেইলু।

মানবীয় অস্ত্র। এ মানবীয় অস্ত্র এগ কিগ? এ অস্ত্র এগর আকারহানেই বা কিসাদে? নাতাউ এ অস্ত্র এগর গা-হান কতিহান অর? অর্থাৎ, এ অস্ত্র এগই আঘাত করলে, বিপরীত পক্ষরাং ও আঘাতের প্রমাণস্বরূপ কিহান দরে পারিয়ার? —এসাদে অনেক সরাল। কিন্তুমান, এ সরালর মুঙে কুন বুদ্ধিজীবী, বিজ্ঞানী বার মহাপুরুষ ডাটয়া বহে নারেসি। কারণ, হয়-না-হয় তানুও আকখুরুমতে এ অস্ত্র এগর বিদা খাসিগ।

পুতকর লুহংহান হদেয়া, বহকগরে ঙ্কুরিয়া পিঠিহান বুলনদিয়াই বারার লেইকিৎ হৌরিয়কে বহকগরে চর্চানি। প্রয়োজনহানেই বা কিহান? দিনহানাৎ বহকরে আকখুরুম না চর্চেইলে পেটে ভাত না হমার! —‘?’ উতাইলে, বহক উগর পদফাম উহান হুদা হৌরিয়কর চর্চার বকচা বহানিরকাই হঙ’সেহানথাং?

মাতিয়ার কথা আহান আসে, ‘হারপাকুরার কাজে হুদা ইশারাগৌ কাফি, হারনাপাকুরারকা পুহাক রামায়ণহান হুনেইলেউ— সীতা কার মইলক?’ তবে হয়, আমার হাদিত ‘সীতা কার মইলক’ দল উহানেই নিয়াম।

এপেইং বহক উগ, হৌরিয়কর মানবীয় অস্ত্রের শিকারগ।

মাতে নিয়াম দুঃখ লাগের, সমাজের নিয়াম সংখ্যক বহকলকেয়ে, এজাত অস্ত্রের নরকযন্ত্রণাত মুক্তি পানিরকা নিজর অমূল্য জীবনহানরেউ বাজিৎ থইতারা।



কপালখিপিগ, কিহান অপরাধহান করেসিলিথাং? বহকগ অইলি বুলিয়া? বহকগতে, ওরে হৌরিয়কৌ আকদিন অ-সিলিনাই?

অর্থাৎ দিন আহান হৌরিয়কৌ বহকগ আসিলি, কথা এহান হৌরিয়করাং স্মরণ নেই। উতাইলেতে, তেই প্রতিশোধর দারাং চেপয়া করিরি পাকচাহান, না মানবতার চৌহিদাগ লালয়া নিজরে চিনে নারিয়া করিরি অত্যাচারহান?

রহস্যময়! দুনিয়াহানেই রহস্যময়! এ দুনিয়াং ঠই পালয়া আসি জীব এতার লীলা-খেলা উপ পারানিয়ৌ ডাঙর কর্ম আহান। মাভেতে আমি ‘মানু’ বুলিয়ার, বাংলা ঠারল এ মেয়েক এগরে নিয়াম অর্থপূর্ণ করিয়া ফংকরেসি— ‘মানুষ’। অর্থাৎ, ‘মান’ বার ‘হুস’ দিয়হানি তিলয়া সম্পূর্ণ মানু আগ।

তবে, আজিকালি ‘মান’ বার ‘হুস’হীন কর্মই মানুরাং নিয়াম দেহিয়ার।

পুহাকে নিজর গর এরেদিয়া, নিজর বংশ-গোষ্ঠী ত্যাগ দিয়া নুরাক আরাক আকখুরুম আরাক পরিবার আহানাং নিজরে জরম দেবানির সাদে কঠিন পরীক্ষাং ফঙুরি ও বহক উগর মানসিক অবস্থা উহান কতিহান যে উলট-পালট অ-থাইব, উহান খালকরানির কথাহান। উপেইং তেইরতা প্রয়োজন— বেমলবেঠা বানা-নুংশি। কিন্তুমান প্রায়ই পরিবারে, বানা-নুংশিতে থাক দাবেইতেউ সাং নাইতারা।

‘—হু, মইলক উগে এমাটিক নাগৈতা করিরিথাং হেয়কে সুপৌ না টটরার! উল্টা খাটালগং হমেইবতাই ফিস্-ফিস্, ফিস্-ফিস্ —বানাহানে মরেরতা?’ —সুর আসুলিয়া আসুলিয়া পুতকর দুর্নাম গেয়া ‘ব্যঙ্গোক্তিহান’।

হেয়কে মইলকরে বানা নাপেয়াতে উরাহেইচি করত? উরাহেইচি করানিরকা দশগর মুঙে অগ্নিসান্ধী করিয়া সাতবুলা দ্যরেয়া অর্ধাঙ্গিনীগ করিয়া আনেসেগ?

অনেক মালকলকেয়ে, পুতকরেল বহকরে কিলবারি দরেয়া তৃপ্তি পেইতারা। এহুরুম ও মাতৃভক্ত পুতক উগৌ ‘ইমার সেবা করলুতানা’ বুলিয়া হারৌ অর।

‘প্রয়োজন পইলে জনমকারকাউ এরেদিতৌ, তিতে বার কিগ? আগ গেলেগা দশগ আইতাই, এ দুনিয়াং জেলেয়ৌ কমথাং?’ এসাদে মাতেকুরা মাতৃভক্তর পান্তান্না আঙুলির লেহাং পেয়ার।

ইমার সেবা!

মইলকগরে কিল-বারি দিয়া ‘ইমার সেবা’ বুজ্লে উহান মুনিথকপাহান নাউ

অর, বার মানুরে হুনলেউ আহেইতাই। মইলক উগতে কিতা মেস্তরির কুরুমগ থাং? 'ইমার সেবা' করানির পথ তঙাল, সৎ গুরুর আশ্রয়ে ও পথ টাংখেই সেঙয়া আসে। নিজে হুদা বাসানি বার মনানিয়ৌ লাগতৈ।

অন্যায়র আশ্রয় লয়া সৎ কর্ম নাগৈ, অসৎ কর্ম অরতা। সৎ কর্ম করতে দেহ-মন-প্রাণ শুদ্ধ অনা লাগের। ঔক্খি ভাব-ধর্মসম্পন্ন মানুর কর্মরে সৎ কর্ম বুলতারাতা। আগরে দুঃখ দিয়া আরাক আগরে হারৌ করানি, উহানতে মেইপার উসিল সিলকরানিহান পারা অর। জেসাদে, আগর ঠইগ কারলয়া আরাক আগরাং স্থাপন করিয়া উগরে জিংতা করানির সাদানে আচ্চরিত কর্মরে বুজার। এসাদে কর্মর পরিণাম নিয়াম সাক্তি।

জেতাউ অক, উহানল মইলকগরে কাদুরেয়া ইমারে হারৌ করানির কুন যুক্তিয়েই নাথার। কুপক খালকরলেতে, দিয় বারাদেত্ত নিজরতাই ক্ষতি অরগ। কিয়াবুল্লে, মইলক উগৌ নিজরগ বার মালকগতে অরতে ইমা নাই।

আসলে, এ হুরু কথা এহানি বুজাং নাপরিয়া অ জারগা অঘটন এতা!

এহান কি শিক্ষিত সমাজ আহানর শিক্ষার গিরির চু-কর্মহান?

‘দারাইলে হুজে’ —বুলিয়া আমারাং পরমান আহান আসে। মেরাক পরিবারে বার মইলকর কথাং মৌতুপ অয়া, জরম দিয়াসি ইমা-বাবা বার পেট আকগত্ত নিকুলেসি বেইবুনিরে ত্যাগ দিয়া ‘শ্বশুরবাড়ী স্বর্গপুরী’ বুলিয়া ইরেলগ অয়া সালৈতারা।

তাজ্জু পর পত্নীপ্রেমহান! গারিগং পত্নীপ্রেমে আকয়া, পত্নীসম্পর্কীয় উতারবেদে টানলতা! নিজর রকতর টান উহান দরা অ-পারিলগা!

চ্চি! এসাদে কর্মরে তিকপানি থক। হাবির মুঙে, নিজরে মানুগনা বুলিয়া পরিচয় দিতে লাজপানি থক। মানুর আকার সুরয়া, কৃত কর্মর লেহাং এতান্ত জিঙে অধম কর্ম দুহান সুরয়া নেয়থাইব!

সংসার এহান ডাঙর প্লেটফর্ম আহান। এহানাং, আমি হাবিহানে তিলয়া আগরে আগই চিনিয়া, অন্তরর খৌরাং উহানরে উপ’ পারিয়া বহিঃজগতর মাংকলহানাং নিজরে নিষ্কণ্টক গুণল শাংকরানি লাগতৈ। উহানরকা প্রয়োজন, আত্মসংযম। নিজরে চিনে পারানির সাদে পর্যাপ্ত জ্ঞান বার সাধুসঙ্গ। সাধারণ য়ারিহান, মি যদি মরে না চিনৌরি, মানুরাং মি কিতা বুলিয়া পরিচয় দিতৌতা?

উহানপারা য়ারিহান— লুহং করিয়া অর্ধাঙ্গিনী গিথানকরে যদি হুদা মইলকগনা বুলিয়া, মইলকর সম্মান বার অধিকার নাৎলেতে —তেইর ও

মইলক জনম উহান স্বার্থক নাগৈ। ঠিক উসাদে, হৌরিয়কৌ বহকরে বহকর উপযুক্ত সন্মান বার অধিকার দেনি থক; অনুরূপ, বহকেউ হেয়ক, হৌরিয়ক বার পরিবারর আর সদস্যরে উপযুক্ত কর্ম বার সন্মান করানি কর্তব্য।

উবাকাহে পরিবারে হারৌর খুমিৎ কারতা। আগরে আগৈ রেসা-রেসি, চিরা-চিৰি, চৰ্চা-চৰ্চিল সংসারে হারৌ নাহের। বরং, অশান্তির বৌরে বায়েয়া ঙকখি মন উহানরে হিংসার অর-পেকল উটিয়া বিতরে বিতরে অদম্য রাক্ষসর জরম দেৱারতা।

কুন কুন পরিবারে মালকলকেয়ে মাতে হুনিয়ার, 'লুহং করানিয়ে ইমারে পাহুরল, মইলকগৈ জিংলি!'

হায়হান। লুহং করানির পিসে, পরিবারর বিতরে খানিমানি তঙাল অহান আহের, উহান স্বাভাবিকহান। কিন্তুমান, ইমাই মাৎল উসাদে নাগৈ। অর্থাৎ, 'মইলকগৈ জিংলি, মালকগৈ নাগৈ' এসাদে নাগৈ।

ইমা'।

এ দুগ বর্ণর হুরু ৰাহি এগৎ পৃথিবীহান যময়া আসেগ। মাতে মিকুপহানাৎ উচ্চারণ করিয়ারতা কিন্তুমান তার বিতরর মহিমা উতা ডাঙর ডাঙর মনিষীয়েউ হারপা নারিয়া ৰাহ্ণা অয়া পরেসি। উহানে ইমারেল কুন তৰ্কই নার।

দুৰ্ভাগ্যবশতঃ মালকর এসাদে উক্তি হুনের পুতক উগ হুত্ৰুমেউ কপালখিপাগ। হায় কথাহানতে এহান— জিপুতে মালকরে কুনদিনৌ নাউ পাহুরতারা। পাহুরলাইসতে ইমা মেয়েক এগর অস্তিত্ব মানব সমাজর বুকেত্ত চানাপ্লা মাঙইলৈস। তবে হায়, কর্মর দাপটে খিয়ালর বেলাই খানি অসুবিধা আহান অর সাৎ, উহান ইমারে পাহুরানিহান নাগৈ— উহান কর্তব্যর সিজিল পাজালানির হেৱেদে অর ভুলসৌহান।

আগেতে এসাদে ভুল অনেকতা অ-গেলগা থাঙৌ ঔ ভুল উতা লেহাৎ না পরেসিল, এবাকাতে কিতা অয়া? লুহং করল বুলিয়া?

ইতিহাস সাক্ষী, কাৰাঙৌ কুন জুৰাপ নেই। থাংতে, মালকর এ আচরণে পুত্ৰস্নেহর দুৰ্বলতাহান বুলতাং না বহকর প্রতি ইৰ্যাহান (খালপাল) বুলতাং?

মালকলকেয়ে না খালকরতারাতা যে, ইমারে দৌর আসনে বহেয়া পূজা কৰের পুতক উগরে এসাদে মাৎলে তার অন্তর উগৎ ইমার প্রতি বিশ্বাস অটুট থাইতৈ কি-না?



সংস্কৃতে কথা আহান আসে, ‘জননী জন্মভূমি স্বর্গাদপি গরিয়সী।’ ইমা বার ইমালাম স্বর্গন্তৌ শ্রেষ্ঠ। এহান হুতুমেউ চির অমর বার চিরসত্য বাক্যহান। জিপুতে জেসাদে এ অমর বাক্য এহানরে আদর্শ শিক্ষার মন্ত্ৰহান বুলিয়া নিংকরতারা; মালক লকেয়েউ এ বাক্য এহানর কদর করানি থক।

হু, চমৎকার যুগর পরিবর্তনহান! ইমারে সমালোচনা করিয়া কি রচনা অ-পারেরতা? ...জরম দেসে ইমারে?

কনাকে, স্কুলে গেলাংগা উপেই অজালকেয়ে হিকেইলা— ‘হামেসা হায়তা টটরেয়, মিছাতা নাগে।’ আজি ও কনাকহান নিংশিং অইলে ঙকখি মনে সরালগমাহি উদয় অর। জেতার জবাব দিতে অইলে নিজরে বিদ্রোহ করানিহান সাকর। কিহানতে করানি, মিছাই সংসারে ডর, আপশোস বার অশান্তির বাহিরে কিত্তাউ আনে নারের থাংতে, হারপা হারপা নিজরে নাগেবেদে ইলকরানি উহান থকতা?

পিতৃসত্য রক্ষা করিয়া পুরুষোত্তম শ্রীরামে চৌদ্দ বসর বনবাস খাটিয়া পুতকর কর্তব্যকর্ম পালন করেসিল। শ্রীরামর ও বনবাস অনির পিঠিতৌ ‘ইমা’ এ মহান রাহি এগর শৈনেই পরিকল্পিত কু-চক্রান্ত আহান আসিল। উল্লেখ করানি থক, এপেইং ‘ইমা’ ঘটনাহানর মূল উৎসগ। যেতাউ অক, পিসেদে ও ইমাই “হু’র লারৌগ” ককগং থসিলি; কিন্তুমান, শ্রীরামর মাতৃভক্তির মুঙে তেইর ও কলুষিতা বার অভিমান হাবিরে দয়া ঙকখি করিয়া নেসিলগা। শ্রীরাম পরম মাতৃভক্তগ বুলিয়া পরিচিত অইল।

এ যে ঘটনা, জেতা আমি ধর্মর লেইরিকে পেয়ার এতাতেই আমার নিত্য জীবনর সুর গিঠিয়া আসেগ। হুদ্দা, প্রয়োজনহান অইলতাই ও ঘটনা বার চরিত্র উতারে হারপা পারানি, চিনে পারানির সাদে পর্যাপ্ত জ্ঞান।

হাবি মানুর খালকরিল ইথেই আকতা নাগে, উহানল দেহিয়ার— বিষয়হান আকহান অইলেউ, অর্থ বণেইতে তঙাল তঙাল যুক্তির সৃষ্টি অর।

রামায়ণে শ্রীরামর চরিত্র উহান বাখানর অতীত। আদর্শ পুতক আগর চারিত্রিক দিক উহান বিচার করলে মহামুনি বাল্মীকির কলমগন্ত নিকুলেসে শ্রীরামর চরিত্র উহান সর্বকালর শ্রেষ্ঠ পুতক আগর চরিত্রহান; এপেইং কুন সন্দে নেই। আনৌগ মালকর কু-চক্রান্তর পাকচাং পরিয়া বংশর জেঠা পুতকগ অয়াউ ডিগল চৌদ্দ বসরররকা বনবাসর সাদানে নির্বাসনর শান্তিরেউ

‘পিতৃসত্য রক্ষা’ বুলিয়া মূর পাতিয়া যাকরেসিল। উহান শ্রীরামর মহানুভব রিদি, ভক্তি বার জ্ঞানর পরিচয়হান।

অন্যবেদে, কৈকেয়ীর সাদানে ঠইদরা, খেইনা-খেইনি, রাজ্যলোভ তথা ভোগবিলাসর প্রতি আসক্ত মনর চরিত্রৌ শ্রেষ্ঠতার উচ থাক অধিকার করিয়া আসে। কারণ, তেই ইমা! ইমাই কুনদিন লালৈরিথাং?

‘দশরথ’— ইক্ষাকু বংশর শ্রেষ্ঠ ধার্মিক রাজাগ। নিজর সেত্যান দরিয়া থয়া পুতকরে কি নিষ্ঠুর আজ্ঞাবহ কেরেসিলতা! পিতৃবর্গই জিপুতরে শিক্ষা দিতারা— ‘শ্রীরামর সাদানে আদর্শবান জিপুতর উদাহরণ অই।’

দশরথর সাদানে নিষ্ঠুর, কৈকেয়ীর সাদানে কু-মতি মালক-বাপকর পদফাম ঙালকরিয়া বহেসি গিরি উতাই কুনদিনৌ নাউ খালকরতারা যে, জিপুতরে শ্রীরামর আদর্শপথে কাকেই কারুবেয়া নিজে বার কুন আদর্শবলে পাংকাল খেতসি!

পাঠকবর্গই ভুল না বুজবাং। এপেইং মহামুনি বান্মীকির সুরচিত রামায়ণরে সমালোচনার দারাং চেপকরেসুতা নাগৈ। রামায়ণ, কাল-দিন-খেলতাম সুবয়া তার জাগাং এবাকাউ শ্রেষ্ঠ। কিন্তুমান, আমার পাঠকবৃন্দর পাকরানির, বুজানির, হিকানির বার হিকুরানির ইথেই উতা এবাকাউ ত্রেতাযুগে সীমাবদ্ধ থানাই এ যুগে চলানির পথ উতা ঙক্খি নাইলতা।

আজিকার পাঠকে, রামায়ণহান বুজ্লে হুদা শ্রীরামরে চিনতারা, শ্রীরামর হিন-দুঃখ-লইলাট, শ্রীরামর গুণ গেয়া ধর্ম কামেইতারা। দশরথর নিষ্ঠুরতা, কৈকেয়ীর খেইনা-খেইনিরে কিতাল গুরিয়া থসি তানু জানি!

লুহঙর পিসেকার জীবন উহান মনুষ্যরতা নিয়াম গুরুত্বপূর্ণ সময়হান। সময় না চিনিয়া, লাল-চুম উপ নারিয়া জেপেইং মনেইল উপেইং বৈঠাহান হান্টেইলে সংসারর নৌগ দিশানেই হুংগদে সালরতা। উহানল সময়রে নিয়াম গুরুত্ব দেনা থক বুলিয়া মাত্তারা কথা আহানৌ আসে।

‘সময়’, মেয়েক এগ মাঙে তিনগ বর্গর সমাহারগ দেহিয়ারতা। কিন্তু, এগর মহিমা, কীর্তি মাতিয়া-গেয়া হুদা পারানির সামর্থ কারাঙৌ নেই। তা সাক্তি অইলে, মিকুপহানাং হাবিতা নিশ্চিহু করে পারের; তা হবা অইলে হাবিরাং হরৌর জোঝার কাকরেউ পারের। ‘সময়’ কারৌ অধীন নাগৈ, তা সম্পূর্ণ স্বাধীন নিরপেক্ষ ঝাহিগ। তারে জেগৈ চিনেসি উগৈ তারে পাসি।

হুরু পান্তান্নাসৌ আহান— আজিকার ক্রীড়াঙ্গতর জনপ্রিয় খেলা আহান, ক্রিকেট।

পাঠকবৃন্দই প্রশ্ন করতে পারে, ‘সময়’র তুল বার কিসাদে ক্রিকেটর প্রসঙ্গ আহিলতা? কিন্তু, আসে। সময়র তুল ক্রিকেটর নিয়াম সম্পর্ক আসে। ক্রিকেট খেলাহান অইলতাই— বলারগৈ বল করলে, বিপরীত পক্ষর বেটসমেনগৈ বেটহানল বলগ বারেয়া রান করানি। উপেইতৌ নিয়াম আহান, বেটহানল বলগ বারেইতে যদি বলগ গজেদে কা-পরেরগা, বিপরীত পক্ষই লুপকরলে বেটসমেন উগ আউট। সমাধানহান এপেইতেই আসে, খানি কুপক থিয়াল করিক— কুন কুন সময়ত বলল মাটিহানাং পরিয়া ড্রপহান কাইতেই বেটহানল তুলে দিলে বলগ বাউণ্ডারীগর বাহিরে সিক্স অর। অর্থাৎ, বলগ মাটিহানাং পরিয়া হুদা কাইং বুলিল সময় উহানাং বেটহান সংযোগ অনিয়েই সিক্স অইলতা। অর্থাৎ বেট বার বলর সঠিক সংযোগ অইলতা। ধারাভাষ্যকারগৈ মাতের, ‘বলগর তুল বেটহানর টাইমিংস্থান তিলনি।’ এহুরুম, বলগ মাটিহানাং পরিয়া ড্রপহান কাইতে বেটহানর সংযোগ উহান হেইরাপ তাপ’নিয়ে বলগ বিপরীত পক্ষরাং কেচহান করে তুলে দেৱ। মানে, বেটসমেন আগ ক্রীড়াঙ্গণ ত্যাগ দিয়া পেভেলিয়নমুখী অর।

অর্থাৎ, বলগর তুল বেটহানর সংযোগকালে সময়র এহানিগ্না হের-ফেরর পরিণতিত বেটসমেন আগ আউট অর।

এবাকা আসল বিষয়হানাং আহিক।

বিশেষ করে, লুহঙর পিসে সাংসারিক সুখ আনানিৎ ইমাজাতির ভূমিকা নিয়াম ঠৈ। আর বারা চাংখল নাইলেউ সৎ আত্মচেতনারতে নিয়াম আবশ্যিক। উহানল লুহঙর আগে সৎগুরুর স্মরণ প্রয়োজন বুলতারাতা।

ইমাজাতির জনম দু-হান। আহান লুহঙর আগে বাপকর গৱে; আহান লুহঙর পিসে হেয়কর গৱে। জনম দিয়হানির হাদিগৎ ডাঙর ব্যবধান আহান থাৱ; ও ব্যবধান উহান উপ’ নারিয়া ইমাজাতিয়ে, সংসারে সুখর পটা দুঃখরে গুঙ্করতারাতা।

লুহঙর আগেকার জনম উহান বাপকর গৱে ‘নিঙলসৌগ’ অয়া বংশর মান-মর্যাদা রক্ষা করানিৎ নিজরে যৌকরানি। জীবনর চি-যৌপা মিকুপে নিজরে সমালেয়া গুক্খি পথে ইলকরে পারানির সাহস খমকরানি শৈনেই নিঙল আগর কর্তব্যর শ্রেষ্ঠতম কামহানি। তানু খালকরানি লাগের, তানুই ভবিষ্যতর সৃষ্টিসহাৱ পবিত্র অংশ আকেইহান।



লুহঙর পিসেকার জনম উহান ইমাজাতিরকা আরাকৌ কঠিন। উবাকা হেয়কর হকে, হেয়কর স্বার্থে হেয়কর বংশ মর্যাদা রক্ষাং নিজরে উৎসর্গ করানি। উপেই নিংকরানি, মর ইমা-বাবা আজিতুকুরি মর হৌরিয়ল; মর জন্মদাত্রী ইমা বার পালেসিল বাবা নাগৈ। তানু আজিতুকুরি মরকা হাবিত্ত কাদার কুটুম।

কুটুম?

খালকরলে কথা এহানে অন্তরে নিয়াম দুঃখ দেৱ। যে ইমার বুকগন্ত অমৃত পিয়া ডাঙর অইলাং, যে বাবার আঙুলিগং দরিয়া আটানি হিকলাং আজি ও আপন জন উতা এবাকা কুটুম? কি ঠই দরাহান নাগৈতা?

কিন্তুমান, এহানেই হায়হান। এহানেই সংসারর বৈশিষ্ট্যহান। আজিপেয়াউ এ নিয়মর অবজ্ঞা নাসে; জেপেইং অবজ্ঞা অসে বুলিয়া হুনেসি, উপেইং হুদা অশান্তি বার অশান্তি।

‘কুটুম’। রাহি এগই নিয়াম গুরুত্বপূর্ণ বারা আহান কারলয়া আসে। এ রাহি এগর পাংলাক নাইলে দু-গই তিলয়া থা নারইলাইস। একাধিক রিদির পৌ-বাহক এ রাহি এগর পাংকাল্লহে দুনিয়াহান আকনানে গিঠানির বাসাক করেসিলতা, মহাত্মা গান্ধীয়ে।

আজি লুহঙর পিসে নিঙলসৌগ জন্মদাত্রী ইমা বার পালেসিল বাপকর— কুটুমগ। এ ইজ্জু কথা এহানরে হুদা মনে থনা নাগৈ, এহানরে মূল মন্ত্ৰহান বুলিয়া কৰ্মে প্রয়োগ করানি। অর্থাৎ জেহান খালকরলেউ, হেয়কর স্বার্থে, হৌরিয়লর স্বার্থে; কাম আহান করলেউ হেয়কর হিতে, হৌরিয়লর হিতে করানি থক। বার, হামেসা বিনয়ী, ঠুমকরে টটরানি, গুর্দা থয়া গালগি ফুলানি সুপৌ উচিত নাগৈ।

এপেইং হয়ত প্রশ্ন আহান উঠতে পারে— ‘লুহং অইলু বুলিয়াতে জন্মদাত্রী ইমা-বাবারে মি পাহুরানি উচিত-তা? তানুরকা কি মর কুন কর্তব্য নেই?

‘কুটুম মেয়েক উগর অর্থহান মিহুল সুবয়া হৃদয়ঙ্গম করলে উত্তরহান ঙকখি অইতে।’ বুলিয়া মি নিংকরৌরি।

লুহঙর পিসে যদি বহকগৈ হৌরিয়লর চিন্তা বাদ দিয়া মালক-বাপকর চিন্তা করিরি, ও পরিবার উহান কুনদিনৌ হারৌরে না হাতুরতাই। নিজরতারে পিঠিত থয়া কুটুমরে যদি মূরগং কাকরানিহান অর উতাইলে ও গর উগর শৃঙ্খলা কুরাং থাইতৈতা?

হায়হান, মালক-বাপকর হবা-সাক্তি চিন্তা কুংগে নাকরতারাগ? চিন্তা করানি হাবি জিপুতরতাউ কর্তব্য। নাইলেতে জিপুতর তুল মালক-বাপকর সম্বন্ধহানেই মাঙইতৈ। উতা বুলিয়া জেবাকাউ, জেপেইতৌ নাগৈ। সময়, জাগা বার দিন-কাল বাসানি লাগের। বাবার যদি অসুবিধা আহান অর, মনহান হিনপেইলে তাপ্প হেয়করাং নিবেদন করানি লাগের। চানা লাগতৈ, মর হেয়কে অসুবিধা উহান দূরেই করে পারতৈ না নারতৈ, নাতাউ মর হৌরিয়লে যাকরতাই না নাকরতাই। এপেইং হুদা জিলকর নাগৈ জাঙাকর পরিবারর ইজ্জতর প্রশ্নউ যময়া আসে, যদি বহকসংক্রান্ত কুন অঘটন ঘটের।

এসাদে বিনয়ী বার কঙালা অয়া নিবেদন করলে শৈনেই হবা ফল দিতৈ। অন্যথা বিপরীত। হাবিত্ত রসর য়ারিহানতে এহান— নিজর অহংকারে জ্ঞানশূণ্য অয়া গুর্দাগল ঠেলেয়া এতারে কিন্তাউ মনে নাকরতে, বহকলকেয়ে ‘গর-বান্দুরি’ খুটা উহান জনমকারকা সার্টিফিকেটহানক পেইতারাতা।

যদি কুন মালক-বাপকে জিলকর এসাদে কর্মত সংযত নায়া উল্টা তেইরে সহযোগ দিতারা— ঔ মালক-বাপক উতারে পান্তান্না দিল মত উপমা, মেয়েক ফুটিয়া না নিকুলের। সমাজ আনিষ্কা করতে তানুর ভূমিকা অগ্রণী।

আসলেতে উহানল লুহং করতে নিঙল উগর বংশ-পরিবার, মোটকথাই গুরিগ বিসারতারাতা।

হাবিত্ত রসয়ম্পা য়ারিহানতে এহান যে, আজিকার দিনে বেয়াপার মহা অমূল্য ধন ‘সতী’ বিশেষণ এগ পুহাকে মাঙনির পথে। হৌদিনকার দিনে যে যে সতীর য়ারি পাকরলাং, হুনলাং; আজিকার সাহিত্যে ঔ বারা উহান পুহাকে নিদান।

এ সতী বিশেষণ এগ মাঙনির পিঠিৎ আমি আধুনিক শিক্ষানীতিরে পুরাপুরি নাইলেউ, আংশিকভাবে দায়ী বুলে পারিয়ার। উহানল মাত্তারাতা, শিক্ষা উহান উসাদে গ্রহণ করানি জেসাদে, নিজরে জিংতা করিয়া অপূর্ণ বারা উহানরেহে থমকরে পারানি। শিক্ষাই মানব সমাজে সভ্যতা, আদর্শ এমন কি রীতি-নীতি পেয়াউ তঙাল করে পারের। আজিকার শিক্ষাই বেয়াপারে এমনো উচ ফাম আহানাং ফৌকরে দিলগা জেপেইত্ত তানু, তানুর উৎস উহানরে খুরা খুরা করে দেহানি অকরলা। ফলে তানু নিজস্বতার দাগ-চিনেত্ত দূরেই অইলা। এ কাফামে তানুর অস্তিত্ব তথা সতীত্ব জিংতা করানি উহান, এবাকা জীবন-মরণ মহাসমর।

এপেইং বপা-বপিয়ে মাংলা কথা উহান মনে পরিল। ‘লেইরিক তামকরিয়া লেইসৌ না তামকরলে কানা নেই।’ সৌরে কনাকে স্কুলে দিয়াপেঠেয়ার— শিক্ষালাভ করানিরকা। কালক্রমে শিক্ষাপ্রাপ্ত অয়া ডাঙর ডাঙর ডিগ্রী পেয়া প্রতিষ্ঠিতো অইতারা। কিন্তুমান, উচ-শিক্ষা তালকরিয়াতে কিতা অইব, লগে লেইসৌ না তামকরলা থাংতে তানুরাং পারিবারিক তথা সামাজিক বিশৃংখল দেহা দেব। উহানল কনাকে স্কুলীয়া শিক্ষার তুল নীতিশিক্ষারেউ (লেইসৌ) কাদাবারার বিষয় আহান নিংকরিয়া হিকুরানি থকতা।

কনাকর লেইরিকে তামকরলাং, ‘একতাই বল।’ উবাকা এ ‘একতাই বল’ কথা এহানরে দুনিয়ার পান্তান্নাগ মাহিল বুজাবুজা অজাই নিদ্দুমগ হিনপেইল। কিয়া? ডাঙর অয়া এসাদে আকখুলা-আকখুলি খেই খেই অনারকা? পরিবার আহানাং ডাঙর অয়া, জিংতা অয়া দুগর তুল মন না তিলনিরকা? মাঙেতে হুনিয়ার, কনাকসৌর বুজ কম অর্থাৎ জ্ঞান কম; উহানল পাউরি বুজনে জ্ঞানগৈ আকয়া জ্ঞানর সদ্যবহার করতে পরিবারর মাজে, সমাজর মাজে কৌলির সৃষ্টি করতারাতা?

কনাক সৌএ গর বাগেসি বুলতে সুপৌ না হুনেসি বুন্নেউ যাকরের।

লাজর কথাহান। জ্ঞানে, গুণে, বয়সে টিপ্-টিপ্ অয়া যদি বুজনগৈ কনাকে হিকেসিল লেইসৌ উতা পাহুরিয়া সংসার সাগরে কৌলির গাই মাহি তুলিয়া মানব সমাজ তুলপার করেব; কনাক, আসাংপা মনর গিরি সৌএ, তানুরাংত হবাতা হিকবা বুলিয়াতে নিং নাউ অর।

সৌ।

আজিকার সৌ কালিকার গাং, সমাজ বার দেশর কাণ্ডারী বুলিয়া মাত্তারা কথা আহান আসে। ইংরেজি ঠারেউ মাতেসি ‘...Morning shows the day।’ —‘বিয়ানহান চেয়া দিনহানর দৈরাপ করানি যাকরের।’ থাংতে, হাবিতা বিচার করিয়া হারপেয়ার, প্রাথমিক তথা অকরা এগ যে কুন কাফামে নিয়াম গুরুত্ব থর।

এপেইং সৌর ক্ষেত্রেউ কথা এহানির ব্যতিক্রম নাইব। কিয়াবুল্লে, সৌ এগ মানবরূপী দিনহানর বিয়ানহান। সেন্দাহান ফরৈতে তারতা জীবনর বেলিটিক্ মাদান লালনি লাগতৈ। গতিকে, ভবিষ্যতর সু-ফলর খৌরাংল সৌগরে কনাকে সু-শিক্ষা দেনা হাবিরকাউ কর্তব্য।

শিক্ষা।



শিক্ষা বুলতে আমি ‘হিকানি’ৰে হারপেয়ার।

‘হিকানি’ —সুপৌ নুরাক, কুনদিনৌ উনা নাসি বিষয় আহানৰে উপ’  
পারানি, উহান হিকানিহান। হুদা লেইরিকর অ-আ-ক-খ হিকানিৰে নাগৈ।

জীবনৰ গতি জেসাদে কাৰেউ না বাসেয়া হুদা চলিয়াই থাৰ, তার তুল  
ফংনাউ অর উসাদে নুৰা নুৰা বিষয়ৌ। জীবনৰ এ লালফামে জেগৈ জত  
আগুরাসি, শিক্ষাৰ মাধ্যমে নুৰাতারে ঙ্করিয়া বয়সৰ কেইরাকে চরেসিতা।  
উহানল যে কুন গুরুত্বপূৰ্ণ কৰ্মৎ জেঠা উগৰে পইলা লেহেইতারাতা; কিয়াবুল্লে,  
জেঠা উগৰ শিক্ষাৰ অভিজ্ঞতা খুল্লা-খুল্লিরাংত শৈনেই আঠৈপা থাৰ।

কিন্তুমান, এপেইৎ হেইরাপ ব্যতিক্রমী দিক আহান থা গেসেগা, উহান  
যুগৰ পৰিবৰ্তন তথা পৰিস্থিতিৰ বাধকতাৰ ফলে অর ঙ্কটিসৌহান। হায়হান,  
জেঠা উগৰ শিক্ষাৰ অভিজ্ঞতা হামেসাই খুল্লা-খুল্লিরাংত ঠৈ, এহান স্বাভাবিক  
তথ্যহান। কুন কুন জাগাৎ বার জেঠা-জেঠিরাংত খুল্লা-খুল্লিয়েই ঠৈ অইতারা।  
কাৰণহান— পৰিস্থিতিৰ বাধকতা। উহানল দেহিয়ার, অনেক সময়ে নুৰা উঠুনি  
সৌএ পৰিবারে তথা সমাজৰমা বিতৰ্কিতৌ অইতারা। কিয়াবুল্লে, কালৰ  
পৰিবৰ্তনে জেঠা উগৰ হাগতাকর যে কুন ব্যবস্থা, খুল্লা উগৰ হাগতাকে  
তঙাল অর। উপেইৎ দিয়গির মন না তিলইতৈ; উহান স্বাভাবিকহান।

চলমান সময়ৰ পৰিবৰ্তনে জরম অর এ ঙ্কটিসৌ এতारे বাইল করিয়া,  
পাজালেয়া চলে পারানি উহানেই হাবিত্ত জিঙেসে শিক্ষাহান। জেঠা-জেঠিয়ে এ  
শিক্ষারে মুক্সিহানল ঙ্করানি লাগতৈ। উবাকাহে শিক্ষাৰ বিকাশনাই। শিক্ষাৰ  
বিকাশ নাইলে যে কুন পৰিবার, সমাজ তথা দেশ উন্নত অ নারেৰ।

এহানৰে এসাদে না মাতনি, ‘অবাই, কালিকাৰ সৌগই বুৰা-পাকানা  
অইলাং এতारे হিকাৎ থেঙসে, টিপাহান দিলে নাকগদে সেংকম নিকুলতৈ  
উগই! বর-বাগরৰ শিক্ষিতগ অসে!’

এসাদে উক্তিৰ ফল, নিয়াম সাক্তি। ঔ পৰিবারৰ উন্নতিৰ জাঙে  
অহংরূপী হিষ্ণাপা সাকপা সাংকুরিৰ লতে ঠই পালরতা।

যুগৰ পৰিবৰ্তনৰ তুল মানব সভ্যতা জেসাদে কিৰ্-কিৰ্ আগুৰেয়া  
সালসে, এ গতিৰ তুল খৌ হিজিয়া যে জন চলে নারতারা, তানুর য়ারি দেনা  
আপ্পানে সময় মাংকরানিৰৌ সমান।

আগে ‘আনা’ আহানল বাজাৰ খরচ কৰেসি, এবাকা আহৌহানলৌ মূল

না ফাতর। কতদিন পিসে কুমপেইং ফরৈতৈগা দৈরাপ নাউ অর। অর্থাৎ, সময়র গতির তুল মানুর চাহিদা, ব্যবহার আজি কুরাংত কুরাং ফরৈলগা বিশ্বাস করানি চিল। এহান আমার আহির মুঙে অ-জারগা নিক্কাংক জিংতা তঙালহান।

এপেইং দিক আহান স্পষ্টকরে দেহিয়ার— বিনিময় মূদ্রার দর, মানুর কর্মর তুলনাই বহুগুণে কম। উতাইলে এহানৌ স্পষ্ট অর যে, জেপেইং মানু আগৈ ঘন্টা আহান কর্ম করলে আহৌহান রূপা পেইল, এবাকা উপেইং ও আহৌহান রূপার বিনিময়ে মানু উগই দি-ঘন্টা কর্ম করানি লাগের। নাতাউ, হৌরে দি-ঘন্টা কর্মর বিনিময়ে পেইল রূপা উহানিয়ে তার খরচ না থুঙরগা।

উতাইলে খালকরিয়া চেইক, জিংতা অনির সিজিলে কতি তঙাল আহিলতা! আরাক দিক আহান হাবিয়ে নিঙে থনি থক, মানুর জিংতা অনির মূলে অইলতাই, রূপা। রূপা নাইলে এ দুনিয়াং চলানির সামর্থ কারাঙৌ নেই, কিয়াবুল্লে রূপাই বিনিময়র একমাত্র মুখ্য উপায়হান।

বাংলা ঠারে বার কথা আহান আসে, ‘অর্থই অনর্থের মূল।’

এ কথা এহানাং দম আসে। ‘রূপাই নিরূপাই করের’ —নিয়াম অর্থপূর্ণ কথাহান। মাত্তারা কথা আহান আসে, যে জিনিষহান জেগর জত প্রয়োজন, ও জিনিষ উহানেই তার অশান্তির কারণহান। রহস্যহানতে এহান, রূপার সালেদেহে পরিবারে, সমাজে বার সদনে কৌলির সৃষ্টি অরতা।

কুন কুনগৈ বার ফাগি করিয়াউ এলা দিতারা, ‘য়ে পয়সা বলতাহে...।’ হায় য়ারিহান, আজিকার যুগে রূপাই টটরার। রূপার পাংকালহান এমনৌ জবর— কুনগৈতে এসাদেউ মাত্তারা, ‘পয়সা থাকলে বাঘর চকুও মিলে।’

উহানল, আজিকার দিনে মানুর চিন্তাধারা এমনৌ চহা অনি লাগতৈ যে, হাবি বারাদেত্ত রূপারেই বুজানি; উতা বুলিয়া মানুর সম্বন্ধরে রূপার তুল মরেইলেউ নাইতৈ। নাইলেতে, মানুরাং মানবতা বুলিল চিজ উহান সুপৌ মাঙ পরতৈগা। গতিকে, কিসাদেতে চিন্তা করানি?

উহানৌ হারপানির বিষয় আহান।

আজিকার দিনে মানুর ব্যবহারিক দিক উহান রাজসিক নায়া পারতে বানিজ্যিক অনা থক। বর্তমান দেশর অর্থনীতির হিসাবে খাপ খরেয়া নিজরে নিতেগা অইলে এ পদ্ধতি বিষল্যকরণীর কাম দিতৈ। পরিবারর কামাকুরা আকগরে চেয়া থাইলে না চলের। আকগৈ দাপা আহানরে চলানি, গোরু গারিহানরে ঠেলানিহানর সমান।

আমার কাদাবারার পরিবারে কিন্তু এবাকাউ আদিম পদ্ধতিল চলিয়া আসি। কামাকুরা আকগ, কিন্তু খা-কুরা দল আহান। তানুর উরণ-পিন্ধন, পকেট খরচ যোগেইতে কামাকুরা উগর নিংশা খেতর। কুন কুন সময় তানুর চাহিদা যোগা নারলে বার বদনামরৌ ভাগি অনা।

থাংতে, কর্ম করের গিরক উগরতাউ শৈনেই ব্যক্তিগত চাহিদা আহান থারগ। দুনিয়ার হাবিয়ে জেসাদে ফুর্তি করানি মনেইতারা, তাউ খানিপ্লা অইলেউ মনেইতৈগ। নেয়া না মনানি উহান আরাক যারি আহান, তাতে নিজেই কামাকুরাগ অইল থাংতে তার চাহিদা উহান আরতারাংত খানি ঠৈ।

...কিন্তুমান তা পরিবারর স্বার্থে হাবিতা 'স্বাহা' দিয়া বয়া থার।

তার পরিবারর মানুরে এহান না খালকরতারা যে, মর বাবাই নাতাউ মর পুতকে নাতাউ মর দাদাই কিসাদে আমারে চলেয়া নেরগা; আমিযৌ তারে খানি পাংকরিক, তার ভরিহান খানি কমা দিক।

কিন্তুমান মাতিয়া কানা নেই।

মাহুহান ফাইলে রূপাহানি হাগহানাত টপক পরতৈ, বাবাই চাকরি করের নাতাউ মর পুতকে, নাতাউ মর দাদাই চাকরি করেরমাহিতে কি চিন্তা! স্যুট, কোট লাগেয়া গাঙেদে বুলাং নিকুল।

নিজর বিতরে চলিয়া আহের এসাদে অত্যাচার হুতুমেউ নিয়াম নিন্দনীয়। এজাত কাফামে, কর্ম করের গিরক উগর মানসিক অবস্থা সুস্থ নাউ থার। পরিবারর প্রতি তার খৌ-না-হিজা ভাব আহান জরম অর। এ খৌ-না-হিজা ভাব এহানে দিয়পক্ষর হাদিৎ কালক্রমে ডাঙর দূরত্ব আহানর সৃষ্টি করের।

আসল রসর যারিহানতে মাতানিয়েই পাহুরেসু, যদিশৈ কামাকুরা কপালখিপা উগ শুভকর্মসম্পন্নগ অর, উপেইত্তে আর কুন কথাই নেই।

‘মইলকে বুলেইল! হালাক লকেইরে, হৌরিয়লরে থমকরল।’ এসাদে দুনিয়ার অযৌক্তিক কমেণ্ট। আসলে যে কি গতিহান? উহান খালকরানির হন্না সুপৌ নাকরলা।

কিয়া? কিয়া তারে বিশ্বাস করানি হিনপেইলাতা? তাতে কিতা তানুর পুতকগ নাতাউ বেয়কগ নাগৈ থাং? নিজর বিতরে এ অবিশ্বাসর চারা এগ রুরেয়া কিয়া সন্দের ফল দরুরেইতারাতা?

আত্মবিশ্বাস যাতয়া।

জেবাকা মানুরতা আত্মবিশ্বাস যাতর উপেইৎ, বারার লেম্পালে চরানির



রামা এহান জরম অর। এহুরুম, জেগই নিজরে পাহুরিয়া বারার বুদ্ধিল চলানি অকরের উগরে বার পণ্ডিতবর্গই ‘বুদ্ধিলৌসিং মাঙসে মুখংগ’ বুলিয়া মাতেসি। থাংতে, মুখংই সংসারে জিজ্ঞা না লাগেয়াতে বুদ্ধিমনে লাগেইতা?

পরিবারর বিতরে আগই আগরে বুজানির এ যে মানসিকতা, এহান হাব্বিরাং হাচুরা, নিয়াম সাক্তি নুরাাহান অয়া চলেসে। যার ফলে, উঠিয়া আইতারা পরিবারে নিয়াম দিন হারৌর বৌ না দাবদের।

হাদিৎ বার জেক লাগাকুরা আকতাউ আসিনাই!

তর পুতকে কামার মাহিতে তিতে কিয়াকা হিনপারতা, বয়াহে খেইবে? এবাকাউ কাম করানির সময় আসেথাং? এসাদে অনেক যারি...।

ছাগলগরে, কুকুরগনা বুলিয়া মাতানিয়ে আকয়া হুত্তুমেউ ছাগলগ লেম্পালহানাং তুলিয়া সালসিল বুজন উগই লেম্পালহানর ছাগল উগ পথগং বেলাদেশিল —বুলিয়া কনাকে যারিসৌ আহান হুনেসিলাং।

ঠিক উহান পারা যারিহান, এসাদে মশলাযুক্ত উস্কা কথা হুনতে হুনতে, পুতকর নাঙে জনমহান উৎসর্গ করেসিল বাপক উগৌ দিশাগ থেয়য়া সেচরণ খা-পরেরগা। ফলে কলিজার টুকরাসৌহান বুলিয়া পুতকরে বিশ্বাস করল উগই তাপ্প তাপ্প সন্দি করানি অকরের।

এহুরুমতে কিতাতে অইত! বাপকে পুতকর গজে কুটনীতির কার গাদ্ধানি অকরেরনাই। আগেতে ইজ্জু কথা মাংল উগই এবাকাতে, কথার বিতরে কথা লুকেয়া রহস্যময় করে দিয়া আনের।

এবেদে বার বাপকর কারর বিদা খেইতে খেইতে, পইলাতে ‘বাবা-না’ বুলিয়া জারল উগই কতিতে জারতৈতা; পিসেদেতে পুতকেউ অটরুপী গাণ্ডীবহানাং অর্থনৈতিক সমস্যারে শিখণ্ডীগ হাজেয়া পিঠিয়েদেত্ত চহা চহা কার বাসে বাসে বাপকর বুৰা কলিজা উগ আঙেয়া গাদ্ধানি অকরের।

কিহানতে অইল? কলিযুগে কুরুক্ষেত্র যুদ্ধ!

আর কুন উপায় নেই, যুদ্ধর মইপংগ রহিয়া লইল। কুংগই কারে কুম্পেইং বিদেইতাই তার কুন ঠিকানা নেই। দ্বাপর যুগেতে স্বয়ং ভগবান শ্রীকৃষ্ণই পানা অয়া ধর্মযুদ্ধ করুৱাসিল। আজিতে, ভগবান অলয়া পথ দেহুরাকুরা কুংগৌ নেই। হাবিহান দুৰ্য্যোধন, দুঃশাসন, দুঃশল্য, শকুনী আদির

ভূমিকাল গৈগ অসি। যেমন, আগই আগর প্রতিহিংসাই জৰ্জৰিত ডক্ ডক্ জিংতা আঙারার টুকাৰা আকেইহান।

বাপকেউ এহুৰুমতে উপায় নাপেয়া, ইপুখৌ ভীষ্মর ভূমিকা উহান অভিনয় করানিৎ থেঙর। পুতকরে ‘পুষ্টি পালৈস’ বুলিয়াতে মাতের, বিতরেদেতে বিদেরগা চহা চহা কারর দুহানিয়ে ঠইগ ‘তি থাক মি জাংগা’ দশা উহানাৎ পরেসে।

এপেইৎ পাঠকর মনোযোগহান থেইকরানি মনেইলু। বুৰাকালে বাপক লকেইরতা কাম করানির সামর্থ নাউ থার; এপেইৎ করিয়া খরানির প্রশ্নতে সুপৌ না উঠের। কিন্তুমান, পুতকর সু-চিন্তা, পুতকর মঙ্গল কামনা করানি শৈনেই বাপক আগর শ্রেষ্ঠ কর্তব্যহান থকইব।

বাবা বুলতে গরর মাপু উগরে বুজিয়ার, ইজ্জু কথাই মুরুসিগ। মুরুসিগে যদি বারার কথা হুনিয়া পথগ থেয়র, তলে-তাঙে আসি উতাই কিসাদে হাদি না ফেরতাইতা?

নুৰা বহকলকেই আনানির পিসে কুন কুন পরিবারে বার অশান্তির সীমা নেয়র। কুনতা বহকর বারান্ত কুনতা হৌরিয়লর বারান্ত। অবশ্য হৌরিয়লর বারান্তই খানি ঠৈ উহান আমি প্রায়ই দেহিয়ার।

যেমন, বহকগ গরে হমানির দিনেত্ত হৌরিয়ক চানাপ্লা পারে কাইরি। গরর কাম, খাটাঙর কাম, আবি-জাবি কুলি-কাটুনি জততা আসে বহকর লেম্পালহানাৎ থেইকরিয়া হৌরিয়কে নখগিৎ সির্ সির্ নখপালিশ গসিয়া সাঙইরি। উতাতে অরত উতানাই, এহুৰুম বহকগর গজে থ দিতারা বাধাউকুশৌ টুম্বুর আগ। জেবাকা-হেবাকাউ খাটালগদে না হমেইসগা, হেইমাকর ফামহান না সকইস, জেগ-হেগর তুল না টটরেইস, মুরর ফুতিহান না পরক, সিন্দুরর ফুটাগ ডাটকরে দিস, চুলকাতা না কাপিস, শঙ্খগাসি না বাগক, জতবিল গুরুজনে ভোজন নাকরেসি তি নাহেয়া, বাসেয়া থাইস আদি।

য়াকরিয়ার— নুৰা বহক আগরকা জেতা জেতা বাধকতা আগেকার বেয়াপাই থ দেসি, উপযুক্ততা; হুদ্দুমৌ আদর্শ বহক আগরকা উহানি মূল্যবান অলংকারহানি। প্রশ্নহান অইলতাই, ও আদর্শ উহানি কইগ হৌরিয়লে পালন করুবেইতারাগ?

দেহিয়ারতাতে, বহক উগ যেমন হবা কামিলি আগ। বিয়ানকার সারে চাইরটান্ত নুৰা ইনাফিহানর পট্গ কাকালিহানাৎ পেট্‌ক আটেয়া থেঙইরি উহান চুমসেৎ দিনর দুই আরাইটা বাজের। রাতিকার কথাতে না মাতানিয়েই থকইব। যুগহানতে আধুনিকহান হানতে, যুগর তুল তাল মিলেয়া চলানি লাগের বুলিয়া হাবিয়ৌ চলেসি। দেহরকলকেই থাইলেতে আরাকৌ জুলুম জারানি। রাতিকার বারটা/একটাত বুলাত্ত আয়া বাঙ্গালা-বাঙ্গুলি দিয়া বাতচালুক বিসারতৈ, নাকগ ইনাফিহানর পট্‌গল ডুফাগ দিয়া মাটিহান লেপিয়া দেহরকরে ‘গিরি, বাত দিলু’ বুলিয়া কঙালাক তারে মাতেয়া, পাসমানি করিয়া কাদাত বহানি; হৌবেদে হৌরকে লেংকা-মারূপ বার্তন করিয়া আনুরেয়া রাতি ডিলকরে তাস খেলেয়া ফুর্তি করতৈ, এবেদে বহক কপালথিপিয়ে চাকাম রাহালিগর ভূমিকাহান পালন করিয়া নিদ্রা গিথানকর তুল দরাদরি খেলেয়া থাইতৈ— কি অপরূপ দৃশ্যহান!

হৌরিয়ক ডেইনিয়ে বিট্টিং পারা গারিগ বহকে আনেসে নৌকেজি তিরার মলপাকগৎ টরম্‌ক বেলেয়া নাকগ রহা রহা তেইর দুনিয়া আহানাৎ মশগুল অসে। হেই-জিপুত খেইলা নাহেইলা উবারার তেইর স্মরণ নেই, নিংশিং অইলে মনহান বুজেইরি— ঠেকা নেই, বহকগ আসে।

‘বহকগ আসে’ নাইগে, কামিলিগ আসে বুল্লে চুমইব। উতা কামিলির কর্ম; আচ্চরিংহানতে, ঔ কর্ম উতা হাবিগে কামিলিরেলউ না করুয়া থাইবা।

নীতিশীল হৌরিয়লর ভূমিকা পালন করিয়া বহকগরে হুদ্রা হিকেইলে না চলের, নিজে নীতিবানর মুক্‌খা পিদিয়া কতিহান অনীতির টুশুরগ উহানৌ হিসাব করানি লাগের। নুৰা লুহঙ অসি হেইমাক উহানর মানসিক বারা উহান খানি আহান খালকরানি থকসিল। কুংগে ফুর্তি করানি না মনেইতারাগ, উতা বুলতে হেইমাকর ফুর্তির কথা লেরিকে ফুকরানি পারিয়ারতা?

লুহং করিয়া হেয়কর পদফামহান ঙালকরেসে মুনিথকপা উগর ভূমিকা উহানৌ এপেই সন্দি থা জারগা। ‘অন্যায় করানিও অন্যায় দেহিয়া নাদেহানিয়ে ডাঙর অন্যায়হান’ এহান কনাকে লেরিকে পাকরেসিলাং; এবাকা আহির মুঙে ঘটতেউ দেহিয়ার!

কিসাদে কাষ্টি যমকরিয়া থয়া বহকগরে শাস্তি দিতারা, তেইর হৌরিয়ল উতাইহে জুরাপ দিতাই! মরতাতে ভর্ভুহরির ‘নীতিশ্লোকবিশংতি’র পইলাকার শ্লোক উহান মনহানাৎ আহিল—



অজ্ঞঃ সুখমারাম্য সুখতরমারাম্যতে বিশেষজ্ঞঃ

জ্ঞান লবদুর্বিদগ্ধং ব্রহ্মাপি নরং ন রঞ্জয়তি।

জ্ঞানী মালক-বাপকর গরে আদর্শ জিপুত ডাঙর অইতারা। পরিবেশ বার আবহাওয়ার ইথেই ইলয়া কালক্রমে ও আদর্শবান জিপুতে ওকখি পারিবারিক তথা সামাজিক শৃংখলা বহন করিয়া মানব সভ্যতা সুশ্রী করানিৎ পাংকাল যোগেইতারা।

যে কুন পরিবার আহান তথা সমাজ আহান উন্নতির মূলে এসাদে আদর্শবান জিপুতর একান্ত প্রয়োজন। এপেইৎ তাত্ত্বিক কথাসৌ আহান উল্লেখ নাকরিয়া নাইলু, যোগ্য পিতৃ-মাতৃ বিসারেয়া পুণ্যাত্মা এতা মহাশূণ্যহানাৎ এবাকাউ বুলিয়া আসি; সময়ে বার আবির্ভাব অইতাই, পৃথিবীর ভার হরণ করতাই।

প্রশ্নহান অইলতাই, পুণ্যাত্মা আবির্ভাব অইতাই সময় উহান কুস্বাকা? তার কি কুন নির্দিষ্ট সময়সীমা আসে?

নেই।

তানু, আজিযৌ আবির্ভাব অনারকা আকুল অয়া চেয়া আসি।

কারে?

আমারে।

আমারাং যদি পুণ্যাত্মা ধারণ করানির দৈবিক গুণ, ক্ষমতা বার পাংকাল নেয়র উহানর দোষ তানুরে দিয়াতে কানা নেই। আমিতে, অধর্ম, পাপ, কলহ বার হিংসাল আসুরিক গুণসম্পন্ন অয়া থাইলাং থাংতে, আমার ওরসে অসুরেহে জরম অইতানাই!

উহানল হে পাঠকবর্গ, আহেদিক, আমি হাবিয়ে আকতা অয়া সৎ গুরুর আশ্রয়ে, আসুরিক বৃত্তি বর্জন করিয়া আত্মাচেতনা হজাক করুরেইক। নিজর বিতরে গুমজিয়া আসে দৈবশক্তি উহানরে মিঙাল দিয়া পরমাত্মার তুল আত্মার সংযোগ করুরেইক। দেখতাঙাই, বুদ্ধ, কবীর, নানক, রামকৃষ্ণ, বিবেকানন্দ আমারাং আয়া বার জরম অইতাইগা; পৃথিবী ইমা ধন্য অইতৈ। পৃথিবী ইমাই বার ওকখি নিংশা কারতৈ।

॥ লইয়েল ॥







## সমর সিংহ

জন্ম - ১৯৭৫ মারি, জিলা- কৰিমগঞ্জ, গাওঁ - গৰবন (গড়েবন্দ)।

মালক - ৰূপলৈহমা দেবী, বাপক - ব্ৰজবিলাস সিংহ।

কনাকত হিন-দুকৰ তুল সংগ্ৰাম কৰিয়া ১৯৯০ মারিত মেট্ৰিক পরীক্ষা পাশ কৰানিৰ পিসেদে লেখক ৰামকৃষ্ণগৰ কলেজে নাং লাগেইলগা। কিন্তুমান উচ্চ শিক্ষা তালকৰানি তার পিচুম দিয়গির হাদিগৎ নেয়সিল। ৰূপার অভাব, লেইৱার তপিত্তরই; পাকৰানিৰ মনহান তाराংত থেয়নি অকরল। ১৯৯২ মারিত উচ্চ মাধ্যমিক পরীক্ষারমা তা ফেইল করল। ছাত্রগ হিসাবে উহান তার জীবনর পইলাকার ফেইলহান। পিসেদে বাপকে আর পাকৰানি নারতৈহান হারপেয়া কামর তালাসে গুৱাহাটীৰ পাঞ্জাবারীত খুরতাকর গরে গেলগা। উদ্দেশ্যহান— পাকৰানি, ৰূপা কামানি। কিন্তুমান, জে কুনো কারণেউ অক খুরতাকর গরে থায়া তা তার উদ্দেশ্যহান পুৱা নারতৈহান উপয়া সেংক গাওঁ গিয়া উচ্চ মাধ্যমিক পরীক্ষাত বহিলগা। বসর আহান হিন্দুকগৎ থয়া ১৯৯৪ মারিত উচ্চ মাধ্যমিক পরীক্ষা পাশ করল। ১৯৯৫ মারিত সেংক খুরতাকর গরে আহিল; নানা লইলাট হিন-দুকর হাদিত দিন কাটেয়া ডি.টি.পি. শিক্ষা করল। তাপ্ন তাপ্ন নিজর গজে বিশ্বাস থয়া কাম করতে করতে লেখক গুৱাহাটীৰমা 'ৰুমি-জুমি এন্টারপ্ৰাইজ' নাঙর অফসেট প্ৰেস আগত ডি.টি.পি. অপারেটরর পদফামে চাকরী পেইল। পরিস্থিতিয়ে খুরতাকর গরগ এৱাদিয়া নিজস্ব গর আগ ভাড়া কৰিয়া দিন কাটানি অকরল। সুদীৰ্ঘ সংগ্ৰামর পিসে ২০০৪ মারিত স্থানীয় নিঙলসৌ আগই কিতাই মেসার্স এস.এম.জে এন্টারপ্ৰাইজ এণ্ড প্ৰিণ্টার্স নাঙে প্ৰিণ্টিঙর ব্যবসা আহানর লেইসি বাৱেইলা; পিসে পিসেদে ঔ নিঙলসৌ উগ লেখকর জীবন সঙ্গীনিগ অয়া এবাকাউ হারৌ পিয়ম অয়া আসি।

এমাটিক লইলাটর হাদিতৌ লেখকে সাহিত্যরমা জেতা খুভল দিয়া জাৱগা হুভুমৌ বাখানর কথাহান। তाराংত আৱাকৌ মূল্যবান ইকরা সাহিত্যর বাৱগগৎ গৈবি কাক।